



Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", broj: 49/06, 51/09), u skladu sa članom 171. Zakona o socijalnoj zaštiti, zaštiti civilnih žrtava rata i zaštiti porodica sa djecom ("Službene novine Kantona Sarajevo", broj: 38/14, "Prečišćeni tekst", 38/16, 44/17, 28/18 i 52/21, 40/22 i 13/25) te na osnovu člana 90. Statuta Općine Ilidža – prečišćeni tekst ("Službene novine Kantona Sarajevo" broj: 33/10 i 18/16), Općinski načelnik donosi:

PRAVILNIK

O SUFINANSIRANJU TROŠKOVA PRIJEVOZA DJECE PREDŠKOLSKOG UZRASTA SA TEŠKOĆAMA U RAZVOJU I UČENIKA SREDNJIH ŠKOLA SA PREBIVALIŠTEM NA PODRUČJU OPĆINE ILIDŽA

I. OPĆE ODREDBE

Član 1. (Predmet)

Ovim Pravilnikom uređuju se uslovi, kriteriji, postupak i način dodjele sredstava za sufinansiranje troškova prijevoza za dvije kategorije korisnika sa prebivalištem na području općine Ilidža (u daljem tekstu: Općina), i to:

- a) djecu predškolskog uzrasta sa teškoćama u razvoju i invaliditetom;
- b) učenike srednjih škola koji stanuju na udaljenosti većoj od 2 km od škole, a nemaju obezbijeđen javni linijski prijevoz.

Član 2. (Sredstva)

- (1) Sredstva za sufinansiranje troškova prijevoza korisnika iz člana 1. ovog Pravilnika obezbjeđuju se u Budžetu Općine Ilidža, na ekonomskom kodu 614 114 -16.
- (2) Pravo na sufinansiranje troškova prijevoza po ovom Pravilniku ne mogu ostvariti korisnici koji isto pravo ostvaruju od neke druge ustanove, institucije ili putem drugih programa podrške.
Pravo na sufinansiranje troškova prijevoza po ovom Pravilniku ne mogu ostvariti korisnici koji isto pravo ostvaruju po istom osnovu iz drugih izvora finansiranja.

Član 3. (Rodna ravnopravnost)

Izrazi koji se koriste u ovom Pravilniku, a koji imaju rodno značenje, bez obzira jesu li korišteni u muškom ili ženskom rodu, obuhvataju na jednak način muški i ženski rod.

II. KORISNICI SREDSTAVA I KRITERIJI

Član 4. (Kriteriji za djecu predškolskog uzrasta sa teškoćama u razvoju)

Pravo na sufinansiranje troškova prijevoza za djecu predškolskog uzrasta sa teškoćama u razvoju i invaliditetom može se ostvariti ukoliko su ispunjeni sljedeći uslovi:

- a) da dijete ima prebivalište na području općine Ilidža;
- b) da ima utvrđen invaliditet ili teškoće u razvoju rješenjem nadležnog organa;
- c) da pohađa predškolsku ustanovu;
- d) da nije korisnik iste vrste pomoći iz drugih izvora.

Član 5. (Kriteriji za učenike srednjih škola)

Pravo na sufinansiranje troškova prijevoza za učenike srednjih škola može se ostvariti ukoliko su ispunjeni sljedeći uslovi:

- a) da učenik ima prebivalište na području općine Ilidža;
- b) da ima status redovnog učenika srednje škole;
- c) da stanuje na udaljenosti većoj od 2 km od škole;
- d) da nema obezbijeđen javni gradski linijski prijevoz na relaciji od mjesta stanovanja do škole;
- e) da nije korisnik iste vrste pomoći iz drugih izvora.

Član 6.

(Pratilac korisnika)

- (1) Sredstva za sufinansiranje troškova prijevoza mogu se odobriti i za pratioca korisnika iz člana 4. ovog Pravilnika, kao i za učenike iz člana 5. kod kojih priroda invaliditeta ili zdravstvenog stanja zahtijeva pratnju.
- (2) Pravo na sufinansiranje troškova prijevoza može se ostvariti ili za korisnika ili za pratioca, ali ne istovremeno za oba lica po istom osnovu.

III. POSTUPAK DODJELE I DOKUMENTACIJA

Član 7.

(Javni poziv)

- (1) Sredstva za sufinansiranje troškova prijevoza dodjeljivat će se na osnovu podnesenih zahtjeva, a u skladu sa objavljenim Javnim pozivom.
- (2) Javni poziv raspisuje Općinski načelnik, a objavljuje se na web stranici Općine i oglasnoj ploči.
- (3) Javni poziv ostaje otvoren do 15.12. tekuće godine, odnosno do utroška sredstava predviđenih za ovu namjenu.
- (4) Zahtjev za sufinansiranje troškova prijevoza podnosi zakonski zastupnik korisnika Službi za obrazovanje, kulturu, sport i mlade (u daljem tekstu: Služba), preporučeno putem pošte ili direktno na Protokol Općine.

Član 8.

(Potrebna dokumentacija)

- (1) Uz uredno popunjen zahtjev, svi podnosioci dužni su dostaviti:
 - a) Izvod iz matične knjige rođenih za korisnika;
 - b) Potvrdu o evidenciji prebivališta/boravišta (CIPS), služba pribavlja;
 - c) Potvrdu banke o otvorenom transakcijskom računu podnosioca zahtjeva (kopija kartice ili potvrda banke).
- (2) Za djecu predškolskog uzrasta sa teškoćama u razvoju, pored dokumentacije iz stava (1) ovog člana, potrebno je dostaviti i:
 - a) Rješenje o stepenu invaliditeta/teškoćama u razvoju izdato od nadležnog organa (original ili ovjerena kopija);
 - b) Potvrdu o upisu u predškolsku ustanovu ili Ugovor sa predškolskom ustanovom za tekuću godinu
 - c) Vlastita izjava da nisu korisnici iste vrste pomoći iz drugih izvora;
 - d) Izjava korisnika pomoći/zakonskog zastupnika o udaljenosti obrazovne ustanove do mjesta stanovanja sa tačno naznačenom kilometražom u oba pravca;
 - e) Ovjerena kopija saobraćajne dozvole vozila kojim se vrši prijevoz (ukoliko se koristi vlastito ili organizovano prijevozno sredstvo;
- (3) Za učenike srednjih škola, pored dokumentacije iz stava (1) ovog člana, potrebno je dostaviti i:
 - a) Potvrdu o upisu učenika u tekuću školsku godinu (status redovnog učenika);
 - b) Izjavu zakonskog zastupnika o udaljenosti obrazovne ustanove od mjesta stanovanja sa tačno naznačenom kilometražom u oba pravca;
 - c) Dokaz da ne postoji javna linija prijevoza (potvrda škole, izvod iz komunalnog reda općine ili drugi relevantan dokaz kojim se potvrđuje nepostojanje ili nemogućnost korištenja javnog prijevoza);
 - d) Vlastita izjava da nisu korisnici iste vrste pomoći iz drugih izvora;
 - e) Ovjerena kopija saobraćajne dozvole vozila kojim se vrši prijevoz (ukoliko se koristi vlastito ili organizovano prijevozno sredstvo;

IV. NAČIN OBRAČUNA I ISPLATE

Član 9. (Namjena i visina sredstava)

- (1) Sredstva će se dodjeljivati za:
 - a) Kupovinu mjesečne karte (zona A ili zona A+B) za korisnike i pratioce koji mogu koristiti sredstva javnog prijevoza;
 - b) Sufinansiranje troškova goriva po prijednom kilometru za korisnike koji zbog nepostojanja linije ili prirode oboljenja nemaju mogućnost korištenja javnog linijskog prijevoza.
- (2) Visina naknade za troškove goriva utvrđuje se u visini 15% cijene litra benzina BMB 95 na teritoriji BiH, po prednom kilometru u jednom pravcu, za dane kada korisnik putuje do obrazovne ustanove i nazad.
- (3) Ukoliko obrazovne ustanove koje pohađaju korisnici imaju posebno organizovan prijevoz, isplata sredstava se može vršiti na račun ustanove, u visini cijene tog prijevoza, a najviše do iznosa mjesečne karte javnog prijevoza. Isplatu sredstava vrši Općina Ilidža.

Član 10. (Donošenje rješenja i isplata)

- (1) Nakon obrade zahtjeva, nadležna Služba priprema, a Općinski načelnik donosi rješenje o ostvarivanju prava na sufinansiranje troškova prijevoza.
- (2) Isplata sredstava vrši se u skladu s dinamikom priliva budžetskih sredstava, najkasnije u roku od 20 dana od dana pravosnažnosti rješenja.
- (3) Isplata se vrši polugodišnje:
 - a) Za prvo polugodište školske godine;
 - b) Za drugo polugodište školske godine, nakon dostavljanja izvještaja/pravdanja za sredstva isplaćena u prvom polugodištu.

V. NADZOR I PRAVDANJE SREDSTAVA

Član 11. (Pravdanje utroška)

Korisnici su dužni pravdati namjenski utrošak sredstava za prvo i drugo polugodište u rokovima i na način utvrđen javnim pozivom, i to dostavom: a) dokaza o uplati mjesečnog kupona (kopija kupona ili uplatnica) kada je pomoć dodijeljena za kupovinu karte, uz ovjerenu izjavu datu pod materijalnom, moralnom i krivičnom odgovornošću; b) fiskalnih računa za kupovinu goriva u visini dodijeljenih sredstava, kada je pomoć dodijeljena za troškove prijevoza vlastitim vozilom, uz ovjerenu izjavu datu pod materijalnom, moralnom i krivičnom odgovornošću.

VI. ZAVRŠNE ODREDBE

Član 12. (Stupanje na snagu)

Ovaj Pravilnik stupa na snagu danom donošenja, a objavit će se i na oglasnoj ploči i web stranici Općine Ilidža.

Izradila: Edina Ičindić
Kontrolisala: Lejla Lihovac

Broj:07-11-10536/25

Ilidža, 13.02.2026.godine

OPĆINSKI NAČELNIK

Nermin Muzur, magistar uprave